













LETTRE

A

MONSIEUR
l'Illustrissime Cardinal de Riche-
lieu, sur sa promotion au Cardi-
nalat.



A PARIS,

Chez ANTOINE ESTIENE, Im-
primeur ordinaire du Roy, rue S.
Jacques, à l'Oliuier de Robert
Estienne.

M. DC. XXII.

Case

F

39

1326

1622/pe

THE NEWBERRY
LIBRARY



A MONSEIGNEUR
l'Illustrissime Cardinal de
Richelieu, Evêque
de Luçon, &c.



MONSEIGNEUR,

Encores que vous
ayez l'ame si forte &
si genereuse, qu'elle
est au dessus de tout ce que la For-
tune peut donner aux hommes,
pour les rendre heureux & les cōbler
de toute felicité: Si est-ce que j'esti-
merois defaillir à ce que ie vous
dois, si avec ceste esioüissance publi-
que ie ne vous tesmoignoïs encores
le contentement particulier que j'ay
de voir aujourd'huy vostre vertu
esleuée comme vne parfaicte image

sur la baze qu'elle meritoit. Outre l'ornement qu'une si grande dignité apporte à vostre maison, la France s'en promet vn tel bien, qu'il luy semble que ses playes soient desja cōsolidées en cette heureuse promotion. Et si par vn mal'heureux destin elle a perdu en peu d'années trois grands Prelats reueſtus de la meſme pourpre dont vous eſtes maintenant honoré, elle commence à respirer en son affliction vous voyant r'emplir dignement leur place, & paroistre en nos iours comme vne Lumiere naiſſante en faueur de la Religion & de l'Eſtat. On ne peut auſſi que bié eſperer de tous les deux, quand on voit des Perſonnes de cette capacité monter aux plus haults degrez d'honneur. Vous auez en tout temps donné de ſi bons gages de l'utilité que le public auoit à receuoir

s

de vous, qu'il n'y a periode de vostre
aage, où vous n'en ayez témoigné
de puissants effects. La premiere
fleur de vostre nourriture fut mesme
en si grande admiration dans Ro-
me, qu'elle excita sa Saincteté de
vous promouuoir au Sacerdoce
auant le temps prefix & ordonné
par les saincts Canons. On vous don-
noit dès lors & en cette pleine ieu-
nesse toutes les loüanges que les
hommes chenus peuuent à peine
acquérir & meriter en tout le cours
de leur vie. Les premices de cette ver-
tu que vous offrites dans le Temple,
& comme sur nos Autels, ont esté
suiuies de tant d'autres glorieuses
actions, que ce seroit auoir osté le
prix à tout ce qu'on sçauroit iamais
faire de memorable, si ce grand Roy
n'eust esté inspiré de vous fauoriser
entre tous les Prelats de s^o Royaume.

Si donc ceste auguste dignité vous a esté donnée, ce n'est pas tant pour vous induire & obliger à bien faire, que pour vous tenir lieu de recompense de ce que vous avez desja faict. Vostre incomparable Pieté, vostre grande erudition, & l'integrité de vos mœurs, eussent semblé reprocher l'ingratitude du Siecle, si on ne vous eust esleué sur vn theatre si eminent. Non que toutes vos actions passées n'ayent esté autant de theatres où l'on a tousiours veu reluire les dons & les graces que le Ciel vous a heureusement départies. Cette eloquence qui rauist les Estats Generaux du Royaume, & par laquelle vous animates cette celebre Assemblée à embrasser genereusement vne sainte reformation sur toutes nos confusions, fist voir comme dans vn cristal, la syncerité

de vostre cœur enuers la Patrie nostre Mere commune. Rien ne se pouuoit desirer aux sages remonstrances que vous y fistes à chacun des trois Ordres pour se maintenir en l'obeissance de sa Majesté. Et comme le diamant a bien plus desclat si on le sçait parfaictemēt mettre en œuvre: De mesme si avec la fonction Ecclesiastique dont vous seruiez d'exemple public aupres d'une grande Reyne, on iugea qu'il estoit necessaire d'appeller en la tormente du vaisseau vn tel Pilote que vous estes, qui pourroit assez dignement représenter avec quelle d'exterité d'esprit, avec quelle solidité de iugement & grandeur de courage vous vous sçeu-tes acquiter du ministere de l'Estat? Quelles mains furent iamais plus nettes que les vostres dās

le manimēt des affaires publiques? On ne peut pas dire que le gain ny le trafic d'une sordide auarice ait iamais souillé vostre ame, ny vous ait rien faict commettre d'indigne de vostre naissance. On peut dire au contraire, que semblable à cest Empereur Romain vous n'avez iamais eu iour déplaisant que celuy où vous n'avez peu obliger quelqu'un de vos biens-faicts & de vos faueurs. De qui receurent lors plus de protectiō la veufue & l'orphelin que de vostre bōté, laquelle les sceut tousiours garantir de violence & d'oppression? Et si comme vn or esprouué dans la fournaise, vous avez esté visité de quelque afflictio, soit en la perte de celuy que toute la France a plainct & regretté comme vn des plus valeureux Seigneurs du Royaume

me

me & non moins louable en sa profession, que Test en la sienne cest autre cher Frere, qui dans la solitude vit d'une vie si sainte & si religieuse: ou soit, dy-je, que vous ayez esté agité de quelque autre trauersé, qui a iamais supporté ces infortunes avec plus de constance, que vous auez tousiours faict, voire à l'estonnement de vos ennemis? Et si tousiours vtile & considerable pour seruir aux grandes occasions on vous a rappellé à la Cour, vous vous y estes comporté avec tant de sagesse & de moderation, que rien ne s'y est aigry & alteré que vous ne l'ayez incontinent sceu addoucir & temperer: de façon que l'amour & la concorde se sont tousiours maintenues entre des Personnes sacrées, que le sang & la Nature lient d'une trop estroite vnion pour rompre ny violer iamais la bõ-

ne intelligence en laquelle ils vivent à l'esiouyffance & applaudissement des gents de bien. Vous n'avez pas aussi esté de ceux qui ont profité du temps, & qui ont cherché leur bien parmy la diuision d'autrui, vostre reputation vous ayant tousiours esté plus precieuse que tous les thresors monde. C'est vraiment ceste grande probité qui vous a mis en si bonne odeur aupres du Roy & de la Reyne sa Mere, qu'ils croient que l'honneur où vous estes esleué à leur recommandation est iustement deu à vostre merite, & à la recognoissance des seruices dont ils demeurent si pleinement satisfaiçts. Si leurs Majestez estiment que l'Estat n'en peut que beaucoup mieux valoir, il ne faut pas douter que sa Saincteté ne iuge que cette eslection ne soit vne colomne & vn appuy à l'Eglise.

Et si les dons sont plus ou moins prizez par la consideration de ceux de qui on les reçoit, vous ne pouuiez pas prendre le vostre d'une plus digne main, les deux plus grandes puissances de la terre, la spirituelle & la temporelle ayans fauorablement conspiré à honorer vostre vertu. Sur quel autre Personnage du Royaume pouuoit-on aussi ietter les yeux, lequel peust (Monseigneur) contribuer plus que vous à l'auancement de la Religion ? Quel autre Prelat vous surmontoit en profondeur de doctrine, en innocence de vie en zele & en affection enuers le saint Siege Apostolique, la suprême dignité duquel vous auez tousiours puissamment soustenuë contre ses ennemis ? Quel plus grand Propugateur de la Foy pouuoit-on eslire que celuy qui semble n'estre né que

pour sa deffense? Certes nul ne pou-
 uoit estre estimé plus digne de l'hon-
 neur du Cardinalat que celuy qui
 des-ja décoré de la Noblesse de son
 extraction & de la gloire de ses A-
 yeulx, les va surpassant en toute for-
 te de vertu. Nul ne meritoit mieux
 d'estre dōné pour exemplaire à tou-
 te la France, que celuy qui vray Frā-
 çois a les fleurs de Lys grauées dans
 son cœur, & qui vray modelle de fi-
 delité apprend à ses Compatriottes
 quelle est l'obeyssance, l'amour, la
 crainte & la reuerence du subiect en-
 uers son Roy. O si ce grand Monar-
 que veut appeller à ses Conseils vn si
 digne Prelat, quels fruiçts n'a-t'on à
 en esperer, quelle assistance & quel-
 le lumiere n'apportera-t'il aux affai-
 res en vn temps calamiteux, & où les
 hommes de seruice doiuent estre
 plus recueillis que iamais! Ainsi ius-

qu'à present sa Majesté à son hon-
neur & reputation, s'est fortifiée
du sage Conseil d'aucuns Mini-
stres de l'Eglise, témoignant com-
me Prince tres-Chrestien qu'il reue-
re en la Personne des seruiteurs, la
grandeur du Maistre qu'ils represen-
tent par leur onction. Bref (Mon-
seigneur) par tout où vous puissiez
estre employé, les marques de vo-
stre capacité ne nous serōt pas moins
visibles que les rayons du Soleil. Car
ie puis dire sans adulation que vous
possédez vraiment ces fruiçts de
l'esprit dont parle l'Apostre, & les-
quels sont les ornements d'un Pa-
steur, *Charité, Paix, Patience, Beni-
gnité, Bonté, Douceur, Foy, Modestie,
Contenance, Chasteté.* Si c'est donc
dans l'Estat où vous ayez à agir, la
candeur, l'ordre, & la dignité paroi-
stront en toutes vos actions, sans

qu'une seruire complaisance vous porte iamais à rien de foible, ny de honteux. Vous y ferez comme une forte machine, qui se roidira contre le mal, & qui arrestera le cours de la corruption d'un siecle entierement depraué tel qu'est le nostre, & où il semble qu'il y a plus d'auantage de suiure la Fortune, & esperer d'elle que de la Vertu, laquelle (disoit Brutus) n'est plus qu'un nom vain & de nul effect. Si c'est dans l'Eglise où vous ayez à desployer vos talents, nous y verrons refleurir l'ancienne discipline Ecclesiastique : nous y verrons renaistre les Lettres, que l'ignorance & la barbarie seroiēt pour estouffer, si on n'auoit soing de les redresser en leur premiere splendeur. C'est aussi avec ces pierres que l'Eglise lapide les Heretiques. C'est par le sceptre de la parole qu'elle domine.

Les armes de nostre milice (dit S. Paul)
sont spirituelles. Tout en fin se resta-
 blira à l'éternelle conseruation de
 l'Autel & du Sacrifice si on sçait em-
 brasser vos saincts conseils. Pourtant
 (Monseigneur) imitez-vous vous
 mesme ne pouuant mieux, & face
 le Ciel que comme il vous a donné
 au monde en benediction, il vous y
 conserue longues années en parfai-
 cte santé & prosperité. Sur ces vœus
 qui procedent du cœur & de l'ame,
 ie demeureray iusqu'au cercueil.

MONSEIGNEUR,

Vostre tres-humble & tres-
 obeissant seruiteur,
 PELLETER.

Handwritten text in a cursive script, likely a historical document or letter. The text is arranged in approximately 15 lines, though many words are illegible due to fading and the style of the handwriting. The script appears to be from the 17th or 18th century. The text is written in dark ink on aged, slightly discolored paper.















